

Goenglaux Caeuq Nyaenma

老爷爷和狐狸

Rangh dieg neix dwg diegndoi. Daj gizgyae muengh, ndoi rangh ndoi bya dieb bya. Daj gizgyawj yawj, bya sang ndoi lingq, faex mwn ndoeng nyaengq. Youq ndaw ndoi miz aen suiigu hunghaeng ndeu, raemx sawdikdik, nazreih rog ndoi couh dwg baenh aen suiigu neix dwkraemx.

Boux guenleix aen suiigu neix dwg boux goenglaux ndeu, de boux dog youq ndaw aenranz henz suiigu youq.

Gaxgonq, daxgoeng ngoenz-naengz ndaejhoengq, couh bae benz ndoi dwknyaen youz ndoi guhcaemz. Seizneix de youq gwnz ndoi youq, de naengh ndaw ranz couh dingqnyi roeg heuh cica, yamq ok dou couh yawjraen va hai hoenghwd, baenzlawz lij yungh cienmonz bae youz ndoi guhcaemz ne. Ndigah de couh ciengzciengz epbya, gig noix bae dwknyaen lo.

Daxgoeng yied daeuj yied rox epbya lo. Yienghneix, ngoenznaengz ciengz ep ndaej bya lai, gwn mbouj liux couh ciengx youq ndaw aen gang hung ndeu. Aen gang neix couh

cuengq youq ndaw ranzcauq genjdanh dap baenz haenx.

Seizneix cingq ngamq haeuj seizhah, haemh ndeu, de lij caengz ninz, couh dingqnyi ndaw ranzcauq miz gijmaz yiengj, de couh vax dawz dienhdoengz, gaem diuz faexgyaengh ndeu bae yawj. Yienzlaiz dwg duz nyaenma ndeu daeuj caeg bya gwn, mbouj haeujsim doek ndaw gang hung bae, baenzlawz hix benz mbouj ndaej hwnjdaej. Daxgoeng siengj daengz gaxgonq geij baez mbouj rox gijmaz yienzaen bya couh noix lo, de couh miz di hozndat, siengj moeb duz nyaenma dwghaemz youh boihseiz neix dai bae. Hoeng, caj de yungh dienhdoengz ronghsagsag ciuq duz nyaenma neix, yaengx faexgyaengh yaek moeb roengzbae seiz, de yawjraen ndaw da nyaenma cungj dwg saetvueng laudai, lij miz raemxda gvaengx dwk, de sim unq lo…… Doeklaeng, de cuengq duz nyaenma deuz lo. Gvaqlaeng, gij bya ndaw gang hung de caiq hix mbouj noix gvaq lo.

Yaepda couh daengz seizcou, miz haet ndeu, mbwn lij laepcupcup,

daxgoeng lij ninzndaek gyaenfofo. Sawqmwh, miz duz lawz youq rog nyaui bakdou yienggyatgyat, nyaui ndaej gig gaenjgip, lij doq nyaui doq swenjngo, ngo. Daxgoeng ndiu lo, couh hwnqcong daeuj hai dou yawj.

Bakdou baez dajhai, duz nyaenma ndeu cingq gaenjgip saetvueng dwk ngiengx naj muengh de. Daxgoeng baez yawj, laxlawz dwg duz nyaenma baezgonq de cuengq haenx. Duz nyaenma haenx youh youq gizhaenx cienq gien buet le gien youh gien, couh lumj bouxngoemx miz saehcingz gaenjgip youh gangj mbouj ndaej vah okdaej nei. Daxgoeng yawj le, ndawsim naemj: “Lauheiq dwg nyaenma ra mbouj ndaej gwn, iek lai, daeuj gouz aeu gwn ba.” Yienghneix daxgoeng couh cienq ndang bae ranzcauq, siengj dawz duzbya daeuj hawj nyaenma gwn. Couh youq seizneix, nyaenma fwt cung hwnjbae, gamz dawz gavaq daxgoeng, haenq-rengz rag daxgoeng ok dou. Daxgoeng hwk ndaej doeksaetyat, sawqmwh gamjdaengz miz gijmaz saeh, couh gaen nyaenma daeujdaengz gyang-



hongh. Cingq youq seizneix, deih-doengh lo, aenranz daxgoeng youq haenx sikhaek gunlung lak roengz-daeuj.

Daxgoeng ngaetz lo. Caj de singj dauq, nyaenma caeux mbouj rox buet bae gizlawz lo. De nyaenx mbouj ndaej danq naeuz: “Duz nyaenma neix caen lingzleih ha, couh lumj bouxvunz nei doengsaeh simndei!”

Daxgoeng ngeix mbouj daengz de cuengq nyaenma deuz, nyaenma gingqyienz rox dauqma gouq de, de doiq daihgaya naeuz: “Digiuz dwg aen ranz hung ndeu, doenghduz dwg baengzyoux bouxvunz, gyoengqde yienznaeuz mbouj rox gangjvah, hoeng, hix lumj vunz nei rox ngeix, lingzleih, simndei……” Daj seizhaenx hwnj de mbouj caiq dwknyaen, hix mbouj caiq epbya lo.

(Ganh Sozvwnz/甘说文)



Yungzsuij Myauzcuz Swciyen gig yawjnaek minzcuз gyauyuz. Ndaw doz dwg dahniq Myauzcuz Yungzsuij cingq nyinhcaen guh cozyez. (Lanz Genmingz Siz Gingfungh Van Cujcin ingj)


Ndit Seizdoeng Raeujrubrub

冬阳，暖暖的

Daengngoenz seizdoeng ceiq dwggayez. Gou buet bae daengz cauhsangz, dinghdingh ninz youq gwnz diegnywj, caj daengngoenz okdaej. Hoeng, daengngoenz lumj caeuq gou doxndoj guhcaemz nei, yaep ndeu daj geh fwj diuq okdaej, yap ndeu youh ndoj haeuj

ndaw fwj bae. Gou ngamq laep da siengj yiengsauh ndit raeujrub seiz, youh mbouj ndaej mbouj hai dai daeuj ra aen daengngoenz diuqbeiz neix. Doeklaeng, daengngoenz lumj guhcaemz baeg lo, couh itcig youq gizhaenx mbouj ndoj lo. Seizneix, gou gamjdaengz lumj miz doiq fwngz yawj mbouj raen he, lumj aennaj gou, got genfwngz gou. Miz di rumz raeujrub he, youq henz rwz gou ci. Gou laep da hwnj, aj song gaiq fwngz, gamjsauh cungj cwxcaih neix, lumj youq ndaw loq fangzhwnz gyaundeiz nei. Gou mbouj gamj hai da, lauheiq cungj cwxcaih gyaundeiz neix siusaet bae.

(seiq nienzgaep Cwnz Gaijganh)



Daj Gaijbienq Swjgeij Hainduj

从改变自己开始



Aenndoi baihnaj gyang song go faex miz vunz cang aen vangx he, cienmonz daeuj gaeb raeuz, ndigah raeuz itdingh siujsim bw.

Roeglaej gangj: “Dwg ha, gou miz geij beixnuengx cungj dai youq aen vangx neix lo.”

Roeggacak, roegvaiqughvaiquguz, roegraeu caemh gangj gij sienghah aen vangx neix.

Roegbeggapdoengh gangj: “Raeuz yaek siengj banhfap lid aen vangx neix bae.” Daihgaya cungj doengzeiq.

Roegbeggapdoengh cam: “Boux lawz bae lid ne?” Daihgaya mwngz yawjyawj gou, gou yawjyawj mwngz, mbouj miz boux lawz haengi bae.

Mbouj rox boux lawz youq gyang song go faex gwnz ndoi cang aen vangx he. Aenvangx dwg yungh cag saeknamh gig saeq daeuj san baenz, mbouj yungzheih yawj ndaej ok, hauilai roeg mbin dwk mbin dwk couh bungq deng aenvangx lo, baenzlawz cukcak cungj duet mbouj okdaej.

Miz ngoenz ndeu, duz roegbeggapdoengh he mbin gvaqdaej, raen duzroeglaej venj youq gwnz vangx hemqcaca, gwnz vangx lij miz duz roeg bak nding bwn ndaem dai he, roegbeggapdoengh lau dwk hanhheu cungj conh okdaej lo. De youq henz mbin song gien le, mbin deuz lo.

Duz roegbeggapdoengh mbin ma ndoengfaex baihhenz. De heuh roeglaej, roeggacak, roegvaiqughvaiquguz, roegraeu daengj daeuj, de naeuz:

Roegbeggapdoengh gangj: “Gag raeuz bae lid aen vangx neix miz di dwgrengz. Gawqyienz yienghneix, couh louz aen vangx neix youq gizhaenx ba, raeuz yaek guh haenx dwg, daj seizneix hwnj, raeuz gaijbienq diuzloh mbin raeuz, yienghneix, raeuz couh ndaej bauj aenmingh raeuz lo.” Daijgya cungj ngaek gyauej doengzeiq.

Sanq bae le, daihgaya gak boux gag bae lwnh hawj beixnuengx, baengzyoux swheij, gij siusik neix boux cienz boux, seizneix, caiq mbouj miz duz roeg lawz bungq deng aenvangx neix lo.

Miz gijmaz raeuz gaijbienq mbouj ndaej haenx, couh haghag duzroeg, bae gaijbienq swheij ba.

(Huz Mingzbauj)